

太平軍中被難記

太平軍中 被難記



3 0227 0528 3

上海振寰書局印行

舊上海

一册

定價大洋二角五分

現行新商律彙編

一册

定價大洋四角

普通商業復式簿記

一册

定價大洋五角

最新銀行學指南

附簿記及貼現術

一册

定價洋三角五分

國際條約大全

六册一函

定價大洋壹元

文官考試必讀

一册

定價一元 對折實洋五角

社會通俗 最新尺牘大全

六册一函

定價大洋八角

沈蒙叔千字文

一册

定價有光道令紙三角

民國行軍必讀

一册

壹角五分

弁目勤務

一册

三角

訂改 步兵新教科

一册

四角五分

陸軍部新編 步兵操典

二角

訂改 軍隊內務條例

一册

二角五分

羅少鳳

壹角

俄蒙交涉始末之真相

一册

定價洋三角五分

太平軍中被難記

凡例

一是書原名思痛記。係江甯李小池先生所著。原書梓於前清光緒五年。其時號稱中興。文網嚴密。屬句遣辭。率多顧忌。凡所記載。殊失真面。茲於友人處輾轉。覓得先生手書原稿。亟付手民。貢諸當世。以存信史。

一原稿本所記。於當時洪軍清軍兩方面情狀。均據事直書。毫無左右袒之病。而初梓本。則大失本真。於洪軍則詭譎備至。絕鮮假借。一涉清軍。率闕而不書。或悉數刪去。故讀其書者。皆知洪軍之殘忍。而不知清軍之殘忍。更有過之者。殊可嘆也。是編一遵原稿印刊。其爲初梓本所改竄者。更正之。刪削者。增入之。不敢有一字一語之加減。用存本真。昭公道兼以慰著者之願於九京也。

一原稿上下兩卷。詮註極多。初刊本則十九刪去。兩兩校訂。始恍然於彼所刪去者。皆觸犯忌諱語也。茲編悉照原稿本增入。

一聞有他家紀載。而足與此編互相啓發。兼可以盡其所未盡者。或錄入。或加按語。

一太平軍一役。前清官書所記。全不可靠。卽私家紀述。亦都抑彼揚此。藉求宸悅。若夫直言讜論。畢眞史筆者。又以多所瞻顧。甯朽名山。不敢問世。矧此種紀載。半出耳聞。大都側重記事。而於太平一朝。典章文物。官制朝儀。胥闕而不錄。殊不知洪軍初起。雖屬草創。至其後奠都金陵。則朝有濟濟。太平英俊。蕭相博洽。叔孫多才。一切規制。頗屬井井有足多者。是編於太平官制官規。雖猶未能詳盡。然信筆寫來。已屬不少。西瓜東鱗。全豹可見。亦本編之特色。而他書所莫及者。容亦留心掌故者所樂聞歟。

一洪楊諸傑均係西教信徒。盡人知之。惟是編所記太平軍祈禱諸儀式。則頗與西教有出入之處。想係太平君臣。於未發難時。預事變通者。讀此亦可見洪氏等於隴畔躬耕時。其志已不在小。並可窺太平朝政教相維之大也。

一 是編所載太平軍中通用各隱語甚繁。苟非註釋。便令人無從索解。茲亦照原稿本悉數列入。以期顯明。閱者鑒諸。

匏起誌

太平軍中被難記
凡例

原序

夫人必禍福死生。不爲所撓。而後可以處患難。又必壹心志。審事勢。不易有所爲。而後可以脫患難。並可以有所爲。夫如是。豈英邁磊落。不可嚮邇者所能也。歟。金陵李君小池。人謂其英邁磊落。不可嚮邇。吾獨曰。非是者。蓋以此況君。虛中好學。不以文飾世。故取人。何謂乎。不可嚮邇。旣嘗思之。是正不以文飾世。故取人。致有不可嚮邇之言也。是可慨已。君嘗陷身黃虬青犢中者。凡三十有二月。經極危極險。更遇世俗所謂極歡樂事。胥皆執義。不爲之奪。而能卒保其身。以脫夫危難。不特是也。解人於網羅。脫人於刀斧。拔難弟使其先歸。如庖丁解牛。遊刃有餘。而年纔弱冠。吾恐英邁磊落者。未見有此也。余與君交。始丁丑春。君方先一年環地球行八萬三千里歸來。有所著述。與之語。殊歆然不自滿。余飄泊荒江之濱。極蹇拙極寡陋。而君葑菲不棄。屢詢芻蕘。余不意邂逅中。及竟

有君也。是亦豈易得乎。今年秋出。思痛記畀余。蓋追述庚申閏三月舉家被難。與己身逮壬戌秋。始克脫離虎穴事也。余詳讀一過。曰粵匪自道光庚戌發難。迄同治乙丑乃奏蕩平。歲越十六。省延十六。府州縣之不守者六百有奇。而吾人之陷賊中者。當以億兆計。其幽燐閃爍。朽骸縱橫。與夫化爲灰燼。融爲脂水者。尤弗能以億兆計。若夫幸而不死者。亦莫可紀極。顧今日痛定思痛。能歷歷言之者。蓋少寡焉。當首逆之逼。君納劉女也。多方婉語。多端恫喝。斯正禍福死生判然時。而竟弗爲之奪。是其執義爲何如耶。解兩生於網羅。而資之歸里。脫胡梅垞明經於刀斧。而挈與同逸。旋玩陸逆於股掌。而消其凶悍。逮夫行也。寓書諸逆。喻以順逆禍福。勉其立功反正。是非壹心志。審事勢。不易有所爲。而後可以有爲。可以脫夫患難。嘻。君果英邁磊落。不可嚮邇也乎哉。是記也。豈但痛定思痛耳。人要不但以思痛觀。願君正不可不以思痛名（按）（思痛記係是

編當時在前清光緒五年初梓時原名蓋其時忌諱甚深固不能以太平軍等名字標題也。校者誌）余則願君常若處患難時而益擴充之。將來所底豈易言也哉。用遂書以弁其端云。

光緒五年己卯秋八月仁和鼎拜手撰時同客甬上

太平軍中被難記 原序

太平軍中被難記卷上

江甯李

謝池言

金陵雄冠南戒。夙稱天塹。豈惟是六朝以來。爲帝王建都之所。卽就我國家而言。督部開牙。將軍建鎮。其視他省。會不更較重歟。乃咸豐三年春。粵賊自九江安慶。順流而下。旬日間。燧燧所之。北拔維揚。東踞京口。若張兩翼。然與曩者天塹之稱。抑何異耶。賴向忠武公躡賊東下。駐兵孝陵衛。進遏其衝。使不得逞。其豕突。故鄉村去城較遠者。閒未遭賊禍。六年五月。大營潰。忠武退保丹陽。旋卒於軍。朝命江南提督和春。接統其衆。而以張軍門國樑副之。軍門故向忠武麾下首將。用能克繼前勳。復溧水。收句容。取鎮江。仍逼金陵紮營。咸豐十年正月。克九洲洲。二月。克上下關。孤忠偉績。實爲江南大營冠。惟張以降將起家。而共事。又非往昔向忠武。識者竊憂之。於時江皖諸軍。正屢獲大捷。江以南。浙之東。

西無貴賤。咸謂大功克奏。而不知粵寇之禍。將三面交至。哀哉。余家住聚寶門外樂豐鄉。距城五十里許。曰夏莊。山環水抱。向稱樂土。聚族而居。逮十數世。往大營潰時。曾被過路賊騷擾旬日。以先期趨避得免。賊亦假安民之說。用愚黔首。蓋實未擾及民間也。逮閏三月望日。大營再潰。和張兩帥。仍退守丹陽。張又旋戰歿。城內外悍賊。肆出擄掠。余家始及於難。尤深悔不循六年五月之故軌也。先是兩帥濬長濠圍金陵。城內賊不得食。勢垂斃。意謂大功成指。顧聞將驕兵玩。賊之悍而狡者。謀圍魏救趙計。故僞忠王李秀成。僞侍王李世賢。僞輔王楊輔清等。各統十數萬衆。由皖入浙。杭州戒嚴。馳白羽告急。日數至。大營分師往援。攻圍兵力漸薄。軍餉又爲和帥掌。每四十五日。發一月糧。兵勇心攜貳。以懷張帥德。未忍遽發。(按)當時太平軍中諸將。如忠王李秀成。英王陳玉成。侍王李世賢。輔王楊輔清輩。或禦悍善戰。或沈摯多謀。類皆一時人傑。而江南清

軍渠帥。半屬闖關。又復驕悍凶殘。賊民有餘。禦寇不足。有一張國樑而不能重用。其時兩江總督何桂清以籌餉爲名。頓兵毘陵。擁衆自衛。大營危急。白羽星馳。竟指餉而不發。留將而不遣。斬師而不援。致大營再潰。全局糜爛。推原禍首。實屬桂清。(按)上文李小池所云。自係實況。惟因當時忌諱至深。每多瞻顧。所紀實未盡萬一。茲特錄無錫薛叔耘先生書昆明何帥失陷蘇常事全文一篇。以資證發。雖薛氏亦前清子臣。所書尙多曲筆。然舉一反三。可以識概矣。薛氏原文云。兵部尙書總督兩江昆明何桂清。字根雲。家世微甚。弱冠入翰林。循資入遷而至侍郎。督學江蘇。值粵寇倣擾江南北。頗屬幕客草疏陳兵事。糾劾疆吏之退縮債事者。持論多侃侃。文宗奇其才氣。改官浙江巡撫。年未四十也。撫浙數年。通判徐徵。伎其同官王有齡之驟遷道員。訐告巡撫。獎薦不公。何帥奏陳顛末。語稍亢激。天子責之引疾罷歸。已首途矣。適闕兩江總督。上詢軍機。

大臣此官以籌餉爲命脈。孰能勝任者。大學士彭蘊章奏稱何桂清在浙江。餉徽州全軍數萬人。未嘗闕乏。上韙其言。授兩江總督。彭相故與何帥同年進士。何帥頗謹事之。彭相亦傾心推轂。以謂夷艱濟變。英傑者壽也。何帥復力薦王有齡。籌餉精敏。擢江蘇布政使。由是總督藩司呼吸一氣。攬巡撫徵餉察吏之柄。有齡愈益發舒。巡撫趙德轍不能事事。移疾去。未幾幫辦軍務提督張忠武公國樑攻克鎮江。何帥以籌餉功。加太子少保。咸豐十年春正月。張公總統諸軍。攻克九洑洲。何帥又以籌餉功。加太子太保。當是時。何帥渥承眷倚。慷慨談兵。訐謫輻譽。翔洽。與湖北巡撫胡文忠公林翼相上下。天下共稱何胡兩宮保。云。張公既克九洑洲。進克上關下關。遂與欽差大臣江甯將軍忠壯公和春。濬濠築壘。爲長圍以困金陵。賊渠洪秀全告急於江北皖南諸巨酋。陳玉成。李世賢。楊輔清。李秀成等。秀成慄悍不如諸賊。最後起。頗狡黠。欲披官軍之勢。與其

黨謀曰官軍精銳悉萃金陵其餉源在蘇杭今金陵城外長濠已成官軍內圍外禦張國樑又嚙嗜善戰攻之難得志不如輕兵從間道疾搗杭州杭州危蘇州亦必震動金陵大營懼我絕其餉源必分師奔命以救之我矚大營虛弱還軍急擊躪破大營則蘇杭皆我有也乃自率悍賊千餘襲破涇縣防軍遂陷旌德二月戊戌進陷廣德攻陷四安防營總兵李定泰逃遁賊由安吉武康直犯杭州諸路同時告警上命和春兼督浙江軍務提督張玉良總統援浙諸軍分大營兵勇五之二以界之玉良過蘇州布政使王有齡留之二日俾閱城垣壬戌賊陷杭州將軍瑞昌等退保子城三月丁卯玉良兵至杭州與瑞昌內外夾擊賊黨寥寥不耐戰遂宵遁官軍追復臨安孝豐安吉等城何帥奏稱玉良有齡密計攻復杭州上擢有齡巡撫浙江已卯和帥遣總兵熊天喜曾秉忠率水陸軍攻復長興賊調知大營留兵愈單由浙江境風馳而西陳李楊諸酋各挾

全部先後盡至。大於東壩。己酉攻建平及東壩。皆陷。溧陽圍金陵。先是金陵大營兵勇七八萬人。月支餉銀五十萬兩。皆取辦於蘇松常太及浙江之杭嘉湖甯紹諸郡。兩江總督駐常州。專主餉事。未嘗闕乏。故能撐持八年之久。及和張二帥益募壯勇。增築長圍。需餉有加。浙江告警。大營分兵馳救。驟加行費。浙江自顧不遑。餉亦不繼。糧臺收穀驟絀。月短二三十萬金。何帥馳書告和張二帥。請自後閱四十五日發一月餉。是時頓兵日久。將卒雖習戰事。實已驕佚。酗酒狎妓。酣嬉無度。月支足餉。尙不敷用。及驟聞減餉事。則悵悵如有失。翼長提督王淦。爲和帥所倚。把持軍政。藉勢侵尅。衆情蓄憾。互相傳播。賊若來攻。吾輩堅勿出戰。任大帥與翼長自爲之。賊欲圖大營。詭若將嚮蘇常者。以糜官軍。遣別隊由溧陽逼宜興。進躡武進之夏溪。墮里埠。烽火去常州四十里。王有齡將之。杭州己丑冬。常州議兵餉事。何帥奏令會辦軍務。庚寅。有齡調駐蘇之威振軍。

一千人至。辛卯副將周天孚由浙江率數營至。大營新募潮勇數千亦至。自浙江。何帥先後調防守揚州之總兵馬德昭。及援浙之參將羅希賢。各以兵三千往援金壇。何帥檄令德昭等援常州。遣天孚及潮勇往援金壇。賊俱退出武進界。盡趨金壇。閏三月丁酉。攻陷句容。自是大營後路斷矣。戊戌。張玉良全軍至常州。中途疊接何帥檄。調援大營。及抵常州。和帥連馳羽書令箭調之。何帥曰。彼不知我欲守常州邪。留不遣。和帥復調馬德昭往援。亦不許。己亥。羅希賢一軍自宜興至。庚子。熊天喜一軍自廣德至。前後到郡兵勇二萬數千人。王有齡蒞官浙江。何帥如失左右手。有齡由驛日發一書。爲何帥規畫甚備。戒勿離常州一步。且曰。艱難之秋。萬目睽睽。瞻大帥爲進退。一搖足則衆心瓦解。事不可爲矣。有齡蓋洞見何帥癥結而針砭之也。是時常州無賊。何帥飛章報捷。奏陳常鎮軍情。凡常州、宜興、鎮江、丹陽、金壇。爲路共五。需兵若干。統歸張玉良節制。

自任力保蘇常。辭氣甚壯。何帥意在擁衆自衛。蓋已置金陵大營於度外矣。辛丑羣賊悉詣金陵城外。進矚大營。大半多空壘。羣賊環攻橫突。死戰不退。副帥張公激勵將士。搏戰七晝夜。賊來益衆。餉又不繼。外無援應。諸軍能戰者多留駐常州。九檄而不至。戊申甚雨。雷電以風。大雪厚尺餘。寒甚。人多僵凍。兵勇連日譟至王浚帳下。索餉不得。肆掠通衢。將吏不能詰。己酉夜。諸營火起。王浚部下先遁。和帥部下繼之。全軍遂潰。和帥及幫辦軍務光祿寺卿許乃釗。翼長王浚等。狼狽走鎮江。委棄餉銀鍋帳軍械無算。張公部衆尙未動。聞大師已退。張公頓足曰。八年心力。墮於一旦。憤激欲自裁。部將苦止之。明日乃自殿其師。徐退至鎮江。賊不敢逼。何帥恐和張効己也。亟致書慰勞。請移守丹陽。和帥先至丹陽。遣熊天喜進營白垵。張公招集潰衆。越二日。統一萬三千人。抵丹陽。俾總兵馮子材以萬二千人守鎮江。張玉良自常州城西南五里。表至西北。結二十

營。何帥奏稱丹陽以上軍務。和春張國樑主之。常州軍務。臣與張玉良主之。俟
布置稍定。進圍溧陽。實皆空言也。何帥趣和張進援金壇。新敗之後。士氣不振。
未及休養。賊已由金壇之珥村。繞出丹陽南路。馬德昭迎勦於奔牛。賊趨呂城。
隔絕常州丹陽大道。熊天喜軍潰於白垩。自殺。癸亥。李秀成率賊十萬至丹陽。
憚張公威名。未敢輕進。步步爲營。以造城下。張公開南門出戰。秀成望見徽幟。
人馬辟易。旣潰復集之軍。因連日索鍋帳軍械於常州。不能得。復大潰。賊按兵
未動。張公揮親軍奮馳鑿之。潰卒塞塗。蔽隔不得前。賊溷入潰卒中。狙擊張公。
創甚。猶手刃數賊。躍馬入尹公橋下死。明日。和許二帥以十二騎奔常州。何
帥聞丹陽失守。大驚。總理糧臺前按察使查文經。希何帥意。挈諸司道薛煥。王
朝綸。英祿。聯銜稟請退保蘇州。何帥得稟。牘大喜。即拜疏言。和春已至常州。軍
務仍歸督辦。臣卽駐蘇州籌餉接濟。紳民耆老數百人。卽夕執香赴轅門跪請。

留常。文經諭之解。執鞭之士出秩之。猶不退。何帥怒。遽令開洋槍縱擊。死者十九人。先是何帥密遣親軍護送其父及兩妾至通州。特張榜禁遷徙。并派兵嚴查諸門。紳民曰。彼置吾輩死地。自示不走。無非便其獨走之私。毋寧留之。俾與吾輩同死。夏四月乙丑朔。紳民復相聚遮留。聲勢益洶洶。何帥懼。微服由間道脫走。步行出東門上馬。遇知府平翰在城外巡徼。疑其追己也。手洋槍擬翰以嚇之。翰退避。乃怒馬絕塵馳去。從者待十里外。檣舟運河之廩。遂率親兵五百赴蘇州。查文經以護運餉銀爲詞。先一日登舟去。城中文官皆奔散。惟通判諾穆歡布兀坐危城中。諸軍聞總督已走。燔悉奔蘇杭。縱火劫殺。賊前導。惟張玉良尙在城外。爲守禦計。先燔附城民屋。軍士因肆剽掠。丹陽潰兵繼之。賊隊踵至。丁卯玉良赴西路輅賊接戰。賊分隊由間道來襲。城守營兵叛應賊。玉良率餘兵退營無錫之高橋。城外民屋被焚者。旣無可居。皆入城助守。糧臺尙存銀

七十四萬兩米鹽薪油雜貨稱是紳士中一舉人一醫士倡議擁通判爲城主苦守數日。庚申常州陷。通判及二紳死之。民遭屠戮者尤衆。以何帥禁遷徙故也。何帥至蘇州。巡撫徐莊愍公有壬不納。下令從總督者毋許一人入城。遂劾何帥棄城喪師。暨親兵在道焚掠狀。奉旨革職。拿解來京審訊。何帥次於潞墅關。和帥亦由常州奔至。自殺。何帥走常熟。紳民遞稟謂常熟小邑。不足煩督府親駐。請免駕以召寇。何帥告以親兵乏餉。紳民致餉銀千兩。贖儀二百兩。約無逗遛。檣舟三日。宣言當借洋兵。遂之上海。甲戌。張玉良禦賊於高橋。會合宜興守將劉季三退來之兵。苦戰一晝夜。兵敗復振。賊由間道繞出九龍山之西。襲陷無錫。玉良前後受敵。收餘衆退至蘇州。蘇州兵餉皆被何帥徵入常州。稍有留存者。王有齡又挾以赴浙。徐公以撫標兵可用。俾玉良入城助守。潰兵復爲內應。丁丑。蘇州陷。徐公死之。遺疏劾何帥戲國殄民。玉良奔杭州。何帥奏稱和

春溘逝。兵勇解體。大局搖動。非臣書生所能支持。得旨。平時侈談彼短。一旦決裂。不知認罪。猶以書生自居。可嘆。可恨。殊有愧書生二字。何帥簡任兩江也。軍機大臣長洲彭相力薦之。金陵大營既陷。上慮蘇常必危。彭相輒奏云。何桂清駐常州。籌畫精詳。又有張國樑、張玉良、驍健絕倫之將。文武協力。戰守有餘。寇奚能爲。不數日。警報猝至。則蘇常相繼陷矣。上訝彭相言不讎。且無知人鑒。解彭相軍機大臣。尋自陳衰病。請致仕。許之。賊既據蘇常。分黨長驅。數月間。連陷太倉、松江、嘉興諸州郡。及杭州屬縣。惟鎮江、上海兩城孤懸賊中。越一年。浙江全境遂淪於賊矣。夫粵賊長技。在批亢抵巇。多方誤我。善應之者。當厚集兵力。攻所必救。稍遣偏師能戰者。與彼別隊相角。逐稍久。則彼情見勢絀。狡謀自敗矣。且兵家之忌。莫患乎爲人所致。彼聲東。則我分兵以東趨。彼擊西。則我悉師而西。驚銳氣耗竭。根本空虛。倉卒之間。爲寇所乘。向和、二帥圍攻金陵。皆坐此。

以至潰退。然當和張二師徵兵之時。使何帥不撓其權。亟令張玉良馬德昭等能戰之師。倍道兼行。併力犄角。則大營可全。蘇常亦可保也。乃無用事。籌略紛紜。臨變已張皇失措。一聞賊至。心隕膽破。明知大營萬分危急。稽留勁軍。置之無用之地。是誠何心。卒至老營勢孤。援絕。賢將精卒。併命同殉。悍夫驕兵。乘機鼓譟。大軍既覆。常州遂危。輒復率先倡逃。不能爲一日之守。曩者被留之勁旅。轉瞬悉化爲潰卒。羣賊踵而驅之。勢如黃河奔流。一瀉千里。遂令東南都會。財賦輿區。爲豺虎窟宅者五年。荼毒生靈。全局震岌。誰之咎也。君子於是平情衡量。謂何帥之罪。浮於陸帥多矣。至若陷紳民以規自脫。殪父老以拒攀留。斯又陸帥所不屑爲者。釁盈罪積。中外共棄。無地措身。爲天下僂。雖曲護何帥者。欲爲解免。夫孰而諸。旋忠逆等衆。狡謀旣逞。遂自餘杭長興。節節北來。陷東壩。旬容。溧水。趨秣陵關。僞英王陳玉成。復自江浦渡江而南。閏三月初七日起。紛撲

大營。余家原計遷避。以眷口衆多。人心猶豫。不果行。十三日。叔父輩始謀挈眷抄出大營東。由龍潭渡江。是日。午後起程。曾祖一支以下。長幼四十餘人。行十五里。至天印山脚下之某村。族祖慶山家暫息。其地距營逾三十里。維時傍晚。又值大雷雨。衣物盡濕。不能前行。晚餐後。東北角火起。喧嚷騰沸。近營一帶。避難者紛至沓來。哭聲盈野。急詢前途消息。咸謂大營已潰。龍潭一線路。又爲賊塞斷。是夜。舉衆不能寐。相向以泣。女眷有謀自盡者。苦勸乃止。天明。計無出。婦女又僉言。願回家死在一處。不得已。復回。而車夫夜已奔避。無從招雇。警報接踵。乃各攜老挈幼。或背負其子女。冒雨而行。足深入泥淖中。不可拔。薄暮。抵家。狼狽無人形。四顧火光燭天。人心惶然。婦女自裁者。絡繹不絕。見之不能止。呼搶而已。十五日。賊大至。余叔姪輩趨避草田間。晚後。賊去。跟蹌奔歸。而男婦及僕婢。已死亡散失殆盡。存者。余祖母輩。及幼小弟妹十數人。亦皆奄奄一息。哭

不成聲矣。是夜各處尋覓婦女屍。得余叔祖母徐孺人、伯母楊孺人、母朱孺人、叔母蔣孺人、高孺人、錢孺人、陳孺人、王孺人、張氏、劉氏、及余配毛氏、並諸姑嫂、弟婦姊妹輩。幾二十人。急藁葬之。椎心泣血。尤痛不得成喪。復慰老者。撫幼者。矐目達旦。十六日。度賊來必衆。田間不能避。先與叔父輩扶老幼避入佃戶草屋中。復與一伯、五叔、一兄、五弟、共十三人。同匿於五進西樓窄巷中。巷門遮以大櫥。細輒物藏於此者。可百數十箱。通宅以此處最掩靜。先二日。賊之至者。未被窺破。咸以爲暫避數日。賊若遠去。或可存活。四叔普平。以復出外探消息。另匿於三進扶梯後。余亦欲出尋親族。中同來暫避。三叔海峯斥曰。自己不知死所。猶欲出而尋人耶。語未竟。前進有吹哨聲。賊躑至樓上下奔走搜括。若推雷車。俄聞五進家堂內。第五進中糧向供祖先故名大聲哀號。乃東宅筠洲伯被賊搜出。弔打索銀。曰。若許大宅。何得無銀。號泣中。忽有舉刀砍擊聲。凡數擊。遂寂然。余叔姪已

神魂離舍。腸結欲斷。亦惟有束手待斃而已。日將昃。聞一賊上樓。至西首第一間。卽巷之間壁。余臥室也。搜尋踰刻。出至門外。自言曰。此中必有所在。口音不知何處人。旋走近。扛運大櫥。甫一動。而巷門露。賊推進。日光閃入。余衆皆起立。賊披紅縐衣。面目兇惡。駭絕。莫知所之。賊亦不先下手。惟曰。出來。出來。余衆挨至門外。植立若木。賊亦不卽殺。但將十三人辮髮。連結一處。曰。不準動。動則殺。卻乃進內。以長槍搗穿屋頂。全巷洞明。賊見箱隻堆積幾滿。似欲呼他賊。又恐分其物。先拔短刀劈箱。翻騰金銀物纏腰際。復揀成匹成段綢縐。以單夾衣作袱。令余衆各負一包。當賊進巷時。八叔子林。暗解辮結。推余兄弟走。皆不敢動。賊乃急趨下樓。避入五叔臥室牀下。賊以人多不省記。遂獲免。而余衆十二人。俱被賊驅之下樓。過家堂前。則筠洲伯已被戕。衣物書籍。狼籍滿地。門戶盡闢。內外洞達。聲影俱寂。淒慘之狀。弗可觀。大門外男婦屍二。時已昏黃。莫辨爲誰。

又見二十餘賊。驅村人之被擄者四五十人。或結辮髮。或以長索貫髮辮根。先

後隨行。甲賊謂他賊曰。兄弟們今日發財。又得了多少新傢伙。賊彼此稱謂皆曰兄弟。被擄良民曰新傢

伙賊自居爲老傢伙。老傢伙即老兄弟。新傢伙即新兄弟。

今日回館子。頭子必有賞。

賊謂其占踞之屋曰館子。謂其目曰頭子。

該賊答曰。

恐爲王爺知道。轉怪我們劫奪百姓財物耳。甲亦不置答。因脅余衆隨之行。而自攜長桿槍尾於後。一路屍骸衣物徧野。溝渠河蕩中尤甚。被擄而狼狽行者。不絕於道。稍一趑趄。卽身首異處。又有少年婦女。披髮跣足。僵僵啜泣。賊或挈之隨行。或縛於驢馬背上。或使被擄壯男背負而走。多有乘閒投路旁河渠死者。或哀號不已。怒而被殺者。令人不忍見。不忍聞。轉怪其不早自爲計也。定更時。至賊館。爲相近秣陵關之馬鋪地方。是夜復雨。叔姪共囚一帳棚。驢馬繫棚外。哀鳴不已。又聞隱隱擊楚聲。殺人聲。賊衆聚食歡呼聲。飯至。相顧驚懼不下。咽棚漏雨。坐處薦以亂草。溼氣透裏衣。棚前後看守各一人。通宵目不閉。地獄

卽是眼前。次早雨尤甚。賊令將掠到皮衣。揭取衣面。爭相卷藏。留製衣袴。而以衣裏皮覆驢馬背蔽雨。雖值數十百金。亦不計。以不便攜帶也。賊亦有令禁止騷擾百姓及劫掠衣物等。蓋一恐行軍累墜。一恐怠惰軍心。兼亦以收拾人心也。顧賊衆奉者少。而又以清軍之降附者尤爲凶殘貪暴。絕無人心。余叔姪欲逸去。以守者甚嚴。卽使逸一二。而未逸者必被害。且他棚之逸者。仍被拘回。戮以警衆。乃私語曰。余叔姪竟不必逸。生死一處。卽死亦可無恨。十八日酉刻。忽一賊至曰。頭子叫你們快隨我來。起稍緩。卽怒目以詈。且以白刃作勢。因隨之去。行十數武。進一破屋。向外設一桌。桌後一椅。一綠衣賊。首紮黃綢。蹲踞椅上。卽所謂頭子也。賊引至前曰。新傢伙們來了。又曰。快來見大人。余衆均至桌前。木立。噤不出聲。亦不敢正視。引領以待。良久。亦不令殺。忽大聲曰。你們是一家人麼。願回家否。皆心急口吃。莫知所對。曩聞賊詢人回家。倘答以願回。則曰。送

爾回去甫出門。卽被殺。而以首示於衆。曰：此人要回家。已送渠回家了。蓋欲絕被擄者思家之念。乃賊故智也。五叔禹疇。性果毅。尤孝友。遽對曰：我要回去。曰：何以你要回去。怒目言曰：家中人都死完了。獨老母年踰六十。前日尙存鄰家茅屋中。今不知死活。要回去省視。余衆聞之。悚耳攝魄。暗觸其衣。使勿言。恐被害也。叔父則侃侃而言。兩目直視。悲憤不可遏。綠衣賊笑曰：好好。送你去。送你去。窺其狀。似真和易。而不無惻隱者。言罷。回顧一賊曰：你就送他去。叔父不顧而行。余衆望其去。淚盈睫。不敢下。亦遂不問余衆。仍令賊拘之回棚。屬小心看守。先是僞輔王下令云：此次金陵解圍。須多擄百姓。驅之南下。其文弱不堪。打仗者。準以銀物贖歸。此特輔逆一股私意。他股不若是。且嚴禁也。余衆固不知有是令。回棚依然默坐。切念叔父不知死所。酸楚中。莫能作一語。至薄暮。無消息。再炊許。遠見一賊持燈籠。至行漸近。見燈籠標字曰：李裕後堂。享房。祿記。裕

後乃余曾祖一支堂名。亨字爲余祖。一房記號。福祿壽。卽余先君及五叔八叔三房記號。祿字五叔本房之字也。驚疑間。忽持燈賊徑至棚內。曰。汝家五爺已回家。酬我銀十兩。渠屬放心。渠當陸續來贖你們。明日我還要送二三人去。此燈籠特持來示信者。聆其語音。似係湖廣籍。想係老賊。而爲頭子所信任者。故委以此事也。而其語余等時。氣甚和。面色頗不惡。語畢。匆匆去。蓋持銀送與頭子。且告以陸續求贖語也。余衆心始少定。惟欲探祖母輩消息。不可得。自是每日歸者。一二人三四人不等。賊意非奢。稍有所得。卽置不問。余至第四日始歸。行至南陽村之三令橋地方。遇伯叔兄弟輩於橋側之劉氏宗祠。相抱而哭。急詢祖母消息。曰。尙在鄰屋中。心稍慰。橋去家尙有三里。衝衢也。諸叔曰。回家之路。賊往來不絕。不可歸。此處有賊首僞示云。不再騷擾百姓。嗣知賊首於此等事。殊出真誠。無如其部下裹脅既多。收降尤濫。流氓地痞。積匪劇賊。敗卒降勇。

甯集一鑪。致於此等事。令出不行。視同弁髦。而莫之知。即知亦莫之止。下文所述種種騷擾。殘酷事實。均此輩爲之。於正眞之太平軍人。暨其渠率無屬也。無論眞否。且在此暫避。再作他圖。從此遂不得歸家。家中老幼。不復知其死生矣。鄉人之集於是者。二三百人。自忖我叔姪止十餘人。一遇賊。皆不能免。誠不若投於大羣。勢衆或易避。欲擠入人叢。力不逮。時嬸舅高渭賓。自綠楊頭名村避難來余家。亦在是。仍計議遠避。忽他隊賊過此。披紅束綠。挾新擄人百數十。迤南而行。復擄余去。行不半里。適先擄余衆之賊。亦由此行過。高舅立路旁。爲緩頰。卽喝令釋之。因得脫。此二次被擄。閏三月二十一日事也。二十二日。諸叔曰。賊僞示雖言之鑿鑿。然下不奉行。殊不足恃。今觀賊相不善。過路大隊。且紛紛而來。我十餘人同在一處。設不測。均被殺。我家無遺類矣。乃議二三人一起分頭避匿。且戒之曰。萬一再被擄。勢必長驅南下。各人宜小心。不可太執性。執性恐

被害。尤不可說業儒。聞賊中亦重讀書人。而各魁帥於讀書人尤爲敬禮。凡被擄。卽收入賊巢。司筆墨。或尊爲上賓。參預幃幄。不易逃脫。雖然萬事有定數。見機而行。他日或可爲漏網之魚。正語聞。一人奔至。曰。後面又放火矣。俄殺聲四起。大隊又來。余急拉胞弟盈之。並遇族叔兆賢。共趨村中劉姓宅偏室躲避。至則已先有三十餘人。衆急閉門。以大石抵禦。屏息於內。從此同逃之叔姪十餘人。僅一弟相隨。此外又不復知其死生矣。言猶在耳。痛也何如。日將晡。左鄰火起。衆大驚。黠者援牆以觀。曰。尙隔一巷。且係逆風。無患也。心仍忒忒不已。忽聞擣門聲。衆莫知所措。中一人語衆曰。遲早是死。我輩人多。若賊少。可併力殺之。擣門聲漸厲。不十下。門槽脫石自倒。一賊提刀至。衣黑短衣。黑綢袴。腰纏紅綠綳。髮長五寸許。參參覆額。若婦女。一望而卽知爲官軍之降賊者。面麻身短。作湖廣語。厲聲曰。妖魔鬼。賊中罵人語也還不出來。連說兩聲。似未敢遽入。余兄弟相抱。

一處頃之言欲殺賊者亦莫敢稍動。此輩殆有邪氣乘之。故一出聲已足令人畏若豺虎。俄又來數賊。徑入內捉人。麻面賊始入。而將余弟兄及族叔。又二鄉人拽之出。以繩索聯貫其項。方押令隨行。而身後一片哀號聲起。蓋已被長槍刺傷數人。鮮血濺余衣矣。此次被擄。方之前兩次尤危迫。觀此情形。魂魄俱喪。而心轉若無懼。自念既未卽殺。或可免害。又幸弟兄同在一處。遂隨之出。賊衆漫山遍野。一望無際。被擄者纍纍皆是。行至村東小屋中。將余等五人閉置一室。反扣其扉。已先有男婦二十餘人在內。頃又有鄉人四名來。忽又擄一女。至年近二十。中人姿乃余家佃戶。同村龐國富之女。來片時。爲一長髮面美。十三四歲之賊。自西邊屋來。招之使出。曰。頭子叫你。女不肯去。拽之行。門閉如故。俄聞東屋一人曰。我止有此子。十三歲。世道若此。總難存活。知喬大人待人極好。送來服侍大人。隨語其子曰。爾好好服侍大人。聲極哀楚。聞一賊曰。狠好。你這

老頭兒腿怎麼樣。曰：左腿已斷。不能活了。賊乃留其子。而遣其父。嗚呼慘矣。此老蓋逆料其子斷不能留。不如出而獻之。較勝於捉去。得以不死。或冀他日逃歸耳。余弟兄默坐此室。聲息不通。作楚囚對泣狀。忽數賊推門入。拖婦女去。西首室內。遂隱隱有啜泣聲。哀號聲。不堪入耳。俄東邊賊目。所謂喬大人者。傳晚飯酒肉。歡呼與婦女狎褻聲。備至。忽又有喊殺聲。拖拽聲。砍擊聲。放火鎗聲。鬪鬧不已。蓋婦女不堪其擾。稍拂賊意。致被殺害。不啻天翻地覆。而余獨惜此婦。此女之不早死也。是夜。屋前後看守甚嚴。有一人夜半逸去。旋捉回。被亂刃死。天甫明。有賊來言曰。速喫飯。就要起程。又曰。我們頭子姓李。湖北人。東邊頭子姓喬。湖南人。後知李喬等俱係官軍。潰敗後降賊者。幸而在我們這邊。不殺你。若在喬大人手裏。昨夜已都殺了。你們出來試看那邊。甫回顧。則男婦屍堆積矣。又二賊至。其一卽麻面賊。曰。你們能打仗者。充排面。挑擔者。充排尾。

賊謂少壯

者爲排面老弱者爲排尾

各人須自言。不言卽殺。余弟兄莫能對。賊擬以刀曰。瞧你們不中用。不如殺卻。一賊稍文細。著紅縐窄袖短襖。黑縐袴。曳花鞋。辮結紅絲線曰。你們能寫字否。仍不敢答。麻面賊曰。此卽我們頭子李大人也。你還不說。乃曰。不甚會寫字。曰。會做裁縫否。曰。不會。曰。然則你們能作何事。盈之曰。本不能作事。何必要我們。余恐見害。急語曰。只會打雜看門耳。曰。姓什麼。余指盈之曰。渠姓錢。我姓周。賊遂置之。出門去。余疑賊不卽殺。又不置可否。其或釋我乎。未踰刻。忽傳令動身。其時族叔亦在旁。遂均爲賊拽之出門。以包裹三。令各負其一行。未數武。見龐女已換新衣。首紮紅綢。騎驢背上。與賊目李姓。並轡而立。言笑自若。咸稱之曰。貞人。賊謂擄掠苟合之婦女曰貞人蓋已配賊目矣。馬後有小賊數輩。年十三四。五不等。衣鮮豔衣。紅辮線。背負刀。或令旗。或以紅黃綢包若木板者一塊。長五寸許。闊二三寸。厚不及寸。蓋僞印也。手則或攜短刀。或籐條。或虎叉。貌都美麗。白晢。

髮長二三寸。至尺餘。咸稱之曰二大人。或曰公子。實皆賊之變童也。行則緊隨馬後。住則環侍左右。寸步不離。承顏希旨。竭力作狐媚態。而性又皆喜放火殺人。噫。殆兩閒戾氣所鍾歟。余等共縋一索。被擠入衆中。不敢不行。又不敢作悲苦狀。意謂中途有隙。或可脫逃。復一轉念。又甚悚懼。時各路賊俱南下。號稱數百萬。攻犯蘇杭。途中十餘人駢比而趨。擁塞紛呶。若鴉羣。若蟻陣。袤數十里。無閒斷。其中眞賊。如兩粵、兩湖、江西、福建、安徽、及金陵城內者。十之四五。餘皆新擄者。行至龍都鎮。見街西火猶未息。而街東火又起。死屍縱橫。有身首異處者。至湖熟鎮亦然。各處燒殺搶掠。亦多有爲潰敗之官軍所爲者。不盡屬賊也。又官軍敗賊及克復賊所據城池後。其燒殺劫奪之慘。實較賊爲尤甚。此不可不知也。余家市房之在姚西大街者。正兆焚如。騰騰熊熊。勢冲霄漢。貨物門窗器具。隨所在皆是。復出杜桂東南趨。足無停晷。中途有疲弱者。幼不良於行者。稍

一蹲坐亂刃交下斃於路旁。或有突躍入河冀脫逃者甫入爭以長桿槍刺之。或擊以火鎗。百無一生。水爲之赤。農民欲逃而被覘破。或逃而被獲。立割其耳。而反縛其手以行。雖血流徧身。不容住足。逮頹憊甚。乃殺之。殆以其人強壯多力。欲使充前敵。怒其不肯爲之用。故誅耳疾驅。逮其將斃。殺之以警衆也。路旁小屋中。或墳地幽曲處。見一二老幼。雖垂斃。必刺之死。或用槍尖挑一首。盡一足以行。至婦女幼弱。被驅迫踐踏而死。抉眼流腸。尤不可以數計。此等慘酷情狀。聞賊帥亦頗加懲儆。顧終不能止。天也。又此種慘况。就賊軍言之。却亦非一例。皆然。不過鄙人不幸。適值此一股殘賊耳。行至一處。忽聞停隊喫飯。則見其空曠所在。已有甌石。徧支銅鐵鑊。火猶未息。散棄盂碗器物。零腥剩穢。蓋前行者已於此造飯作食去矣。於是衆賊爭先占據。或奔近村。搜尋食物。並命將新擄者肩負之米糞之。不管生熟。虎咽狼餐。頃刻已畢。余等恐饑不能行。前車有

鑿欲食而苦不得下咽。勉強食數口。遂亦棄之。時見捉回鄉人十數名。賊爭相砍殺。余不敢視。方轉背。一賊奔至。曰。汝不欲見耶。偏要汝見。強拽之轉。而拖一人至前。戮使衆視。其人已倒地。賊握其辮髮。就頸後砍之一刀。甫下。尙聞呼號聲。二刀卽不動。三刀頭已斷。僅連喉間軟皮。割之使落。鮮血噴三尺外。亦有一二刀頭墮地者。十餘人頃刻畢命。刀聲割然。賊舉首謂衆曰。逃則照樣說畢。向空擲下。提刀而去。余衆尙木立。而賊衆喝令前行矣。時天氣悶熱。地滑泥浮。鞋襪已去其一。足不自主。日跌行六十里。至句容縣城。以相近之城門閉塞。繞入一門。城脚腐屍縱橫。忽一舉足。若踣入淤泥中。深沒踝。而有物梗格刺脚底。回顧則正在屍腹中。驚駭欲絕。復爲屍絆仆。未及起。後人已擁至。腿爲踏傷。盡力挽前賊衣。始得立。乃又爲其刀尖戳傷手指。種種危迫。尙是大幸。使竟不獲起立踐踏以死。或以盡力拽此賊衣。賊怒而殺之。則腐於足下者。又多一個矣。惟

時不覺痛楚。隨之入城。賊住一廟中。繫余等於兩廊下。俄李賊偕龐女及數小賊。咸到大呼洗浴。水至無洗具。接以木桶。忽一小賊命二人扛盆至。乃假諸鄰館。賊大喜。裸體當衆洗之。諸小賊亦洗。他賊亦有洗者。甫畢。狂呼拿酒飯。忽又來廊下牽二人去。使燒火搬物。殿上僅一神案。賊衆以衣包高疊若櫟。環坐而食。旁支木板。龐女及小賊七八人。就而食之。觀案上賊僅六人。連小賊共十三人。而兩廊同難者。幾二十人。簷列長槍七桿。旗二桿。賊之衣物。緊束桿上。餘皆食物。楨擔。忽又令兩廊各去二人搬飯。飯以木桶扛至。均卽就碗取飯。有瘦肉二大碗。生硬而香。疑之。蓋驢腿。在路受傷。殺以佐食耳。余初不覺飢。坐定。飢極。弟兄各食飯二大碗。茶則無有矣。聞殿後屋被焚。賊皆就殿上料理。臥處。殿三間。偶象早經擊碎。李賊就中間神龕內鋪設。東西龕衆賊爭據之。龕寬展各容三四人。龐女亦在中龕。而以大旗遮掩。賊慮兩廊人逃逸。使均至殿上市地。

臥而令二賊臥殿前游廊守之。余弟兄同臥一處。憊極。漸睡去。覺有人語曰。汝弟兄宜小心。三日後無患矣。俄又聞大聲喊殺。驚醒。夢也。殆連日憂懼恐怖所致歟。抑否耶。復睡去。天明始醒。手足痛甚。而亟思食飯。至黑硬若石子。仍強咽二碗。食量陡大若此。真詫事也。日出。復促令起身。仍各負包物。出城東南馳。排擠擁塞。一若昨日初行。肢體痛楚。漸行亦漸不覺。日隅中。行益急。旁一賊隨行。隨解衣袖。拏肘不易出。使力過猛。後肘觸余肋。痛徹心髓。眼爲之黑。仍閉目俯首。忍痛行。聞賊言前有房屋。將就彼喫飯。少頃果到。賊衆就各空屋生火煮飯。余得少息。設再行。必殆矣。余不欲食。盈之取飯。至勸之。食少許。喘未定。前隊賊又發喊起行矣。過一大村落。屋燬盡淨。臨河大樹以百計。樹下各有死屍一二具。反縛樹身。肢體焦黑無完膚。樹亦無枝葉。蓋賊及官軍等擄人勒索。不遂則縛人於樹。施焚如酷毒。一至於此。行不百武。聞說河梁已斷。須渡水。驚甚。謂盈

之曰渡水必死不渡死尤速汝緊牽我衣尙可死在一處逮至河沿見有板壁門窗聯絡成筏十數具浮水面賊首已先渡余等至有賊提刀驅使登筏筏容十數人彼岸賊牽筏上繩以達板木溼滑因而墮落者若投石於水纍纍不絕以其中或有幼者弱者立不穩卽失足致聯貫者遂皆被拖落也余弟兄足踏處係窗之格眼得穩立同難者鑒於前車復著力扶挾故免於死乃行不數里又隔一水幸尙淺狹賊多以槍桿蠱地借力躍過同難者咸涉水而行水深過膝衣袴盡溼若是者凡五六日暮抵丹陽又九十里矣丹邑爲土城失守後圯缺已甚賊衆自缺口入不辨其方向入城後一賊持旗疾趨云先去打館子賊尋屋屯住謂曰打館子逮至一處門首豎紅旗白字爲典聖糧等字樣趣余等進內一油坊也賊住正屋而處余等十數人及他館之新被擄者三四十人於後面矮屋守以數賊屋頗寬展無閒隔惟大磨數十具空隙處牛糞塞滿青蠅作聲各踞磨盤

坐作牛喘。鄉人之黠者，謂守賊曰：我輩已隨行數百里，諒難逃逸，皆願順從。乞暫釋其繩，準一二人到廚下取水飲。賊喜，允釋。三四人隨之行。俄扛二木桶至。茶也。且有碗十餘事，於是爭取碗灌之。又若牛飲然。余弟兄亦各得一碗。雖碗垢凸起，茶若泥漿，不亞玉之漿瓊之液也。有數賊來言：天忽奇寒，頭子令各人往尋物事，速隨我來。遂令各去其索。余不知何意，驚甚。轉念既許取茶飲，或無有他變，遂亦隨衆行。一人私詢黠者何意，答以想必要我輩尋鋪蓋禦寒耳。黠者復乘機詢賊：良然。至相近一家門內，女屍數具，穢甚。室尚有牀帳、瓶盃器皿。翻倒徧地。一小兒屍伏牀下。各人以夜臥無具，遂室尋覓。賊亦東掀西撥，或以刀剗地之隙處，冀得財物。時已昏黑，余弟兄癡立不知所爲。同難中有一張姓者，曰：磨盤上弗能睡，人皆搬取木板，爾亦要否？曰：力不逮，安能致此？曰：我可帶去。又一人與被絮一卷，曰：夜來恐受涼耳。余甚德之。之二人者，乃鄰村農人。嘗

受惠余家盈之已告知姓氏故有是關切也與盈之扛木板置盤上飯至各取飯和茶就木板食既坐觀動靜正欲睡盈之頭痛甚試以兩指就其頸後力拈之現紫色痧也復拈其四肢曲處覆以被絮使安睡余一夜焦思曲肱以守困極甫睡去耳畔人聲嘈雜驚起則又須吃飯前行矣急喚盈之醒詢頭痛否曰愈矣殆拈痧後氣血行動又安睡徹夜遂竟愈大幸也使痛不得行尙堪問乎飯未畢數賊至仍以麻繩聯貫其頸押令前行聞昨夜賊復得鄉人二幼童三自他館逸出被獲者余等包裹得彼分負之賊言奉令須速行今日至金壇連夜攻城蓋丹陽溧陽高淳溧水句容諸邑俱早陷金邑自閏三月初間解圍至是復攻圍也亭午不少駐聞今日必至金壇始吃飯賊衆益狼奔豕突舉刀喝令速走日未昃抵金壇之北門前面黑煙冲霄砲聲震耳乃前隊賊已先至交仗矣擄余衆之賊目李姓乃僞管糧官向居後隊因擇城東北隅距城一二里

許臨河一古廟住下。專就四鄉打糧濟賊食。同難者得免列前隊。當矢石。至是始知其故。咸竊幸之。此閏三月二十五日事也。余弟兄體素弱。余尤瘦甚。居家讀書。未嘗行遠。間至戚家。雖五七里。必有代步者。此次被難。日或六十里。或九十里。一連三日。若似乎有神助。其實乃因插入衆中。手拽前人衣。後人復拽余衣。推之挽之。非我所主。足底皮肉若浮漚。個個潰爛。其不斃於中途被蹂踐者。蓋死期猶未至耳。坐未定。賊目令造飯。飯甫畢。急促衆賊帶被擄之強壯者十餘人。往近村一帶。搬木板。尋物件。又令余等數人收拾打掃。至是貫項索獲解去。殿後屋五間。賊目攜龐女居其一。二。三小賊居其一。餘爲賊衆四五人。並數小賊居之。殿正中設一桌。桌後南向設一椅。若公案然。曰天父堂。殿東壁一桌。堆紙筆。爲賊之掌書記處。殿西置刀槍旗械。兩廊亦遮以門板。篋簾。而地。支板。高五六寸。處余等被難者二十餘人。大門內左右各一間。另二賊居以守門。一

卽麻面賊也。廟左右有屋舍平行處。多支藍白布帳棚。皆他館賊居止處。料量畢。李賊出坐殿中椅上。語一年約二十餘。髮已如辮長。面白身矮瘦。賊曰。掌書大人。老賊司筆札者通稱曰掌書大人。髮短者曰先生。要備表文敬天父。一稱拜上帝。賊隨去。少頃。握黃紙一通置桌上。又一賊傳人曰。俱來拜上帝。隨見長髮賊大小十三四人。至分兩邊挨次立。李賊立正中。面向外。復謂一賊曰。可令新傢伙們立廊前觀聽。余衆至。則李賊首倡。羣賊和之。似係四字一句。不了了。約二十餘句。倡畢。所謂掌書大人者。趨至桌前。北向捧黃紙。不知喃喃作何語。讀罷。就火焚之。聞七日一禮拜。屆期必若是。是卽賊剿襲西洋天主教以惑衆者也。賊目令衆坐。於是踞者。躡者。蹠足者。倚肩搭背。舞手動脚者。賊相畢露。小賊二三人立賊目後。裝水煙。呼余衆至。問姓名。各報訖。至余。余答曰。周繼成。盈之曰。錢復保。掌書一一註簿。此後各於姓上加一老字。因呼余曰老周。賊目又言爾衆係新來人。宜一心歸順天。

朝。賊中自謂曰天朝。

不可逃走。逃走必死。復問能挑擔打先鋒。賊謂四處搜掠曰打先鋒。者。須自言強壯。

者。咸答曰。能。剩余弟兄。及一族叔。一老者。一病者。三幼者。共八人。不知所對。幼童一。最小。約十歲。極清秀者。賊目收爲義子。其二均十三四歲。爲守門。二賊索

去。余五人答皆不能挑擔。只會打雜。賊乃派令打雜。心始定。又曰。我是典聖糧

官。指各賊曰。他們都是老兄弟。指所謂掌書大人曰。他是先生。本隊總頭子。是

遡天義。

僞王以下僞爵之尊者有六曰義曰安曰福曰燕曰豫曰侯等名目每字上加一天字。天字上復別以某字。

姓黎。湖南人。屬於侍王。現在

侍王調我們遡天義。同值天義盛大人。攻打金壇。打破後。卽派駐守此城。不再

他往。此間左右館子。係各典官管理軍械旂幟服食等項。連我共有三十六名

目。爲遡天義屬下三十六典官。恒居後隊。毋庸打仗。爾衆安心。勿想家。其不爲

前敵所擄。亦大幸也。自明日起。逐日隨老兄弟們去打糧。不能去者留館。燒火

當差。說畢。令人帶回。賊衆亦都散。此又賊中所謂講道理也。回至廊下。均極疲

憊曲肱而臥。衾枕並無。亦不覺寒。竟酣然睡去。次日早起。肢體痛絕。踝肉破爛。盈之腿足且浮腫。皆不良於行動。早飯畢。各館四出抄掠。人馬喧闐。近城一帶。鎗礮不絕。鉛彈有飛至屋上。鏗然作聲者。余弟兄驚懼相顧。淚盈睫。欲逃無隙。又各牽制。不忍獨行。且並不識路徑。忽一賊稱俞百長者。皖南人。來派余等五人。事而以燒火牧驢馬兩事。屬余弟兄。因見腿足俱壞。不堪奔走。猶事之安逸者也。自是遂住下。僂僂與作無人形。彼此戒勿道出眞姓名。尤不便時作私語。恐彼覬破。防逃逸。不使共處也。是處爲衝衢。門首石橋已斷。河下屍滔滔皆是。賊衆自鄉抄掠回。多經過門首。殺戮之慘。蹂躪之酷。無日無之。筆難盡述。姑略言以見其概焉。其被擄之強壯者。以白刃逼令居前隊。當矢石。無論矣。弱者。存活十不二三。餘則或亂槍戮死。亂刀砍死。或帶活剖腹。摘取心肝。或繫首於樹。積薪胯下焚灼。若火鎗擊死。快刀殺死。猶死之善者。婦女貌陋者。亦多死。美者

至沿路逼淫。力拒慘死者十之六七。或帶至賊館充貞人。少違意。使衆賊輪姦。至憊極而後殺之。窮凶極惡。無所不至。但如行此類事者。大抵以湘鄂皖贛等籍人先充官軍。或流氓地痞。裹附於賊。或戰敗而降賊軍。積賞得爲老兄弟者居多。其正真粵賊。則反覺慈祥愷悌。轉不若是其殘忍也。試舉數例以證之。有賊目汪典。鐵喬巴眼者。俱楚南人。聞先爲官軍。蓑衣渡之役。戰敗而降者也。尤殘忍嗜殺。汪擄一婦。及其五六歲一女。留館多日。忽詭稱送婦及其女回家。婦欣然使女前行。婦居次。汪賊提刀以隨。纔行數十武。忽向婦頸後力砍一刀。婦仆哀求。再一刀。頭落。置頭女肩。使負回。女力不逮。倒地。汪掖之起。舉刀向女顛門盡力劈之。立斃。狂笑而回。喬賊一日擄數人至。慮其逃逸。設毒計以警之。乃遞刀與其同伴。使互相割耳。逼令自食。內一人不割。喬賊曰。汝不欲割渠耶。渠爲汝何人。實告。則赦汝。其人曰。渠我叔也。曰。汝不喜割渠耳。或喜殺渠頭。乃另

喚一人。拽渠叔辮髮。使跪地。與刀令砍之。謂如不砍。卽砍汝。復以他賊刀擬其頸。其人甯死不應。喬怒甚。立殺二人。更皆剖取其肝。卽使同伴者捧入炒熟。分衆食之。荒淫穢惡。不一而足。惟幼童之美者。爭相奪取。設心尤不可問。賊蓋以金邑屢攻不下。死傷實多。出而擄掠者。亦時被鄉民截殺。恨毒遂不可解。負志節者。自盡固多。此則一念貪生。致遭毒辱。深可歎也。以上所述係專紀賊衆中之凶悍者之情狀也。至官軍一面。則潰敗後之擄掠。或戰勝後之焚殺。尤屬耳不忍聞。目不忍覩。其慘毒實較賊又有過之無不及。余不欲言。余亦不敢言也。各館有私逸者。追回必殺。殺時衆賊爭先取刀。一若以殺人爲極樂事者。間有不殺。必割耳剗鼻。或束鍼五六枚。就其人兩頰或額上。刺太平天國。賊中謬以國作國真心殺妖等字。塗黑水使透入骨。謂之切字。或未被追回。亦多半復爲他館擄。同一不免。李姓目性頗仁慈。尙不嗜殺。然館中所謂掌書大人陸疇楷者。金陵大

中橋人癸丑城陷被擄。性與汪典鐵輩同。以殺人爲快事。同難中及續擄之金邑人共逸六人。去捉回者四人。皆此賊對衆殺之。此處儼然殺人廠。每近黃昏。風物慘淡。鬼聲啾啾。悚人毛骨。賊初不畏怯。七月初旬。至白晝現形。賊夜臥無故驚喊。他館亦然。幾於無處非鬼。草木皆兵。夜不敢眠。令衆鳴鉦施銃以達旦。余觀此益不敢逃。又咸以飲水不潔。受濕毒之氣。生瘡疥。備嘗辛苦。骨立形銷。一日盈之正牧馬田間。余適赴河下淘米。相與竊議。信步去館里許。正欲乘閒逃逸。值館中汪賊打糧回。遇見。詢余何來。此心虛無以應。詢盈之。則曰來牧牲口耳。均被帶歸。以盈之未離牲口。無逃逸形迹。置不問。乃以余逃走告李。不由分辨。李賊適與一黃衣賊對飲。余度必死。閉目立以待。李賊喝令殺黃衣賊爲緩頰。李曰。看公子情面。此次免死。隨呼切字。陸賊以鍼至。余憤極。以爲刺字則終身不能去。不若死卻乾淨。時方寸已亂。無所懼怯。乃大聲曰。甯死不願刺字。

陸來刺。極力以拒。李賊既笑。且詈黃衣賊。復請免李首肯。汪賊在旁。掣刀背盡力向肩際一擊。曰。饒你了。余痛絕暈地。黃衣賊者。余未嘗見過。訪之。爲浙江人。遡逆公子也。善念頓生。肯爲緩頰。微斯人。余萬不獲免矣。聞值遡兩酋下令。七月望前。必須破城。並令後隊僞典官。各選數人幫助。於是自初十日起。盡力攻城。更剗地道。實火藥轟之。其時東北門外。尙有官兵石壘二座。與城相犄角。甚勇銳。賊連日死戰。夜不收隊。賊飯乃各館擔送。李賊館中派二賊往。一日三餐。令同難中輪流扛送。一賊押之以行。不行則怒目擬以白刃。余弟兄各送兩次。經險要處。鎗礮彈簇簇若雨點。各館送飯者踵相接。咸低首蹠蹠而行。中彈倒地。所在皆是有缺一臂。傷一脛。倒於路旁。呻楚中欲轉身而力不逮者。余心神不自主。但強制以劫數兩字。盈之送二次。幸未死。余初次亦未死。二次則危迫萬分。蓋正行間。扛物首途者。中彈腦裂而仆。飯具傾覆。余方驚避。又一彈飛過。

小於拳。有與余參錯行者。復中肩暈絕於地。隨行賊亦懼甚。曰。今日恁利害。又不能不送。急與余收拾飯具。蹲地少頃。度余不能獨攜。乃共扛之。而使余居前。行不數十武。則兩彈駢至。一距余頂僅尺許而過。一自余腦後馳過。呼呼然聲若箭羽。辮髮爲少傷。余幾仆。色變股栗。賊仍不使少停。促令急行。踰此始稍定。此正營城犄角處。故鉛彈三面交馳也。賊食畢。令棄飯具。蛇行而歸。每輪應往。弟兄忍淚相視。心爲之碎。計同難中以送飯死者三人。傷二人。余弟兄俱幸不死。要誠有數存乎其間耳。

太平軍中被難記卷下

江寧李圭小池

七月十七日。金壇失守。以地道火發。城垣陷。賊隊遂猛進。呼喊聲。鎗礮聲。聞十數里。守將周參戎天孚。艾參戎得勝。及李邑令淮等死之。周參戎尤驍勇力戰。死葬城內隙地。後見賊發其墓。散其骸。注水滿棺中。緣參戎殺賊最多。爲賊積恨最深故也。李賊聞信。先令二賊入城打館。方收拾進城。逆傳令。後隊次日再進。以城內尙須搜殺也。是夜。咸慮進城後更不易出。多竊議偕逃。詎賊衆亦料及此。先於各路口巡守之。夜半。逸一人。鄰館亦逸三人。均被捉回。呼衆起視。舉火殺之。十八日。李賊進城。驅余等同行。新舊屍填塞街巷。穢甚。城河原窄狹。水爲之不流。赤白膏凸水面。浮漚大於盞。以居人逆料城破。必遭慘殺。先自爲計者。亦有城未破時。遭官軍痞棍等姦淫劫奪。抵抗不從。因而被殺者。更有爲

官軍索詐。誣以通賊。而誅戮者。凡此者。已居十之八九。後死者。直無人收屍。天又酷熱。其新屍。則兵勇居多。未死者。婦女幼童而外。餘則一見卽殺。方欲哀求。已身首異處。李賊館於儒學署。當進城時。賊防余等乘閒逃逸。仍貫索以行。至則見署內外文卷衣物。狼籍滿地。門外有被戕兵勇五六人。照壁旁仰臥。一女屍。身受鱗傷。下體復被一箭。審係官軍之物。殆拒辱慘死者。賊令衆一一拖入學前泮池內。畚土蒿葬之。復令就署內收拾。一若爲久遠之計者。上房李賊攜龐女並諸小賊居其西。而其東則使僞百長陳姓汪姓等居之。進城新獲一女。李以與陳。陳江右人。年二十許。性好殺。數年前亦李所嬖也。中進使居。余衆被難者。每夜於小賊中輪流值宿監守。前進東首。僉姓麻面兩賊。西首。掌書陸賊。攜其孿童小陳居之。後進中室爲天父堂。前爲寫字處。聞有令。明日起。限三日。令各館新被擄者。將城內外屍首。拖至遠處。掘土掩埋。時余衆瘡疥被體。操作

已不勝其苦。語盈之曰：曩被擄時，不言能寫字者，恐深入賊館，未易脫出耳。今實辛苦備嘗，炎夏以來，瘡疾加劇，精力憊極，不堪再任操作。居城外，尙未敢遽逃。既進城，更難爲計。況我輩出門，卽不辨方向，逃亦必死。今後當設法見機而作。是晚賊敬天父後，將寫文書，與僞侍王賀金邑攻破也。陸疇楷蹲踞椅上，李賊坐其旁，桌置紙筆，黃封套，又一長刀，裹以綠縐。陸賊殺人具也，各有小賊立其旁，裝水煙。他賊亦圍聚以觀。陸賊手拂黃紙，捉筆苦思，良久，寫一二十字，不愜意，則扯碎入口，爛嚼唾去。如此者三。余立他賊後，竊觀之。一賊曰：爾敢來看，亦能寫否？應聲曰：能。陸賊怒，欲取刀來擊。李賊詢爲誰，賊曰：老周曰：渠既能寫，卽令渠寫。曰：汝來試寫幾字，與掌書看。余欲藉以稍養息也。因書余捏造之姓名，周繼成三字，與看。李賊大讚賞，連稱寫字頗光。蓋賊不識丁，見筆畫略整，卽以光字稱之。陸賊則尙能辨也。陸命人取凳令坐，與黃紙一摺疊，若稟摺然。曰：

金壇已破。頭子應申賀侍王。汝好好寫來。且教以格式稱謂。余就其語義書之。陸賊氣平。令讀使李聽。李亦喜。旋詰當日何不實告。曰不告者欲逃歸耳。今入城矣。欲去更不易。且在此三四月。看來無性命之憂。既不能去。何妨且做先生。保我病軀。諸賊深信之。李卽命人收拾臥處。與陸閒壁居。他事不令作。專幫陸寫字。復乘機請準錢復保來幫助。賊欣然諾。卽與余同住一室。自是兩人遂不供諸苦差。蓋賊中對於文人。大有禮賢下士之風。每得一人。輒解衣推食。延納惟恐不周。卽拂逆其意。亦柔氣假借。不加呵斥也。次日拖屍出城。亦獲免。此蓋余之苦心。藉此休息殘軀。徐爲之計耳。十九日。汪典鐵來約陸疇楷殺人。陸欣然握刀促余同行。至文廟前殿東西兩偏室院內。各有男婦大小六七十人。避匿於此。已數日不食。面無人色。詢係金邑各衙署官眷。兵敗城陷。避匿於此。爲賊所覺。欲擄之。此數十人誓死不從。並有一二強項者。出言辱之。賊怒故決。

凡有作
原克緒
本約刪去

計殺之也。於是汪提刀趨右院。陸在左院。陸令余殺。余不應。以余已司文札。不再逼。而令余視其殺。刀落人死。頃刻畢數十命。地爲之赤。有一二歲小兒。先置其母腹。腰截之。然後殺其母。復拉余至右院視汪殺。至則汪正在一一剖人腹焉。陸已憊極。拖刀而回。面色呆白。氣喘語急。余曰。何必殺渠衆。不殺亦必死。陸言殺人最快事。爾敢勸我耶。目復努。余懼禍。遂不盡言。噫。此輩若得善死。直無天也。回館。命小陳取燒酒飲。又大聲命水浴身。水來稍遲。則蹬足狂詈。怒不可遏。浴畢。吸鴉片十數筒。始復人形。是夜兆賢叔偕兩金邑人逸去。二十日。有館於學前大宅內。僞正典糧官石明幹者。亦湖北人。來與李賊議。派人掃除大殿。明倫堂等處。堆積米石。於是兩館各派十數人往他郡邑。文廟多供牌位。金邑獨。聖像巍峩。賊衆令數十人背負繩索。盡力拽之。忽轟然而仆。壓斃湖南賊一。傷賊三。一卽陸也。右踝幾折。肩肋傷尤重。氣欲絕。料必斃矣。擡回不一月。

竟愈。第爲廢人。嗣後筆墨。遂專責余弟兄。余不欲他聞。終日居室中。故無可紀之事。一日。李賊來。笑謂余曰。爾姓李。指盈之曰。渠亦姓李。爾二人兄弟也。爾家居夏莊。多讀書人。何以詭言周姓錢姓。殆仍欲逃逸耶。勸今後勿作此想。我已派人到過爾家。爾五叔有信來。隨遞信一紙。無封套。言汝二人尙在人間。我心甚慰。既仍同在一處。總宜小心。不必想家。卽歸來。亦不能過活云云。蓋叔父親筆也。李賊又曰。偷竟逸去。必殺爾叔。燒爾屋。余曰。事已若此。更有何說。我弟兄當照來信。永不歸去。況已做寫字人。又不辛苦。從此安心在此間。若不余信。派人嚴守之。何如。李曰。料爾弟兄亦不敢去耳。遂出。余反覆閱信。憂喜交至。憂則歸計更不易言。設因此弟兄離散。事尤難處。惟叔父尙無恙在家。誠足喜也。盈之曰。此何人道破。又何能認識家中。疑慮閒。恍然悟曰。必龐女之言也。尙李出往問女。誠然。蓋女父國富。數日前探女至。見余弟兄同被擄。欣以告女。欲使知

余弟兄亦尙在此。其實女固知之。特未明言。至是始洩於李。李遂派汪陳兩賊。偕國富往告於叔。藉以囑喝。使不敢歸。而其女或有所恃。得以自解自慰。夜間謂盈之曰。今而後恐不能同處矣。倘竟分往他館。宜加意謹慎。一切聽余消息。次日。李果商之石明幹。使盈之與彼館新擄一人調換。石館所謂先生者。安徽蕪湖人。年約六十。鬚髮俱白。精神爽健。善氣迎人。擄經三四年。老茂才也。性情與陸疇楷判若天淵。調來者馮姓。和州人。雖粗解文字。而行爲殊非我輩。余亦聽之。自是弟兄離隔。幸同爲後隊。此老亦尙可依也。嗣後李賊假以詞色。結之飲食加厚。時令龐女來勸慰。余深惡之。雖極搶白。不怨也。踰兩月。國富又至。偕一五十歲許老人。一二十許女子。又一四十許婦人。婦卽國富女弟。來伴其女者。其老人女子。云係父女。劉姓。與龐有瓜葛者。李令龐女與其姑同處同食。資慰藉。自與國富食。國富居首坐。龐然自大。以與頭子共食傲衆人。李亦曲盡。

謙讓。以媚其女。李遣劉氏父女居西首偏室。令其休息。衆莫解故。或謂將爲陸之配也。一日晚餐後。李令小賊邀余進內。勸納劉女。余詫甚。力辭而出。俄又招入。曲意相勸。龐氏姑姪亦婉言解說。繼以恐嚇。余曰。試問欲余納彼何意。曰。令渠服侍。無他意也。曰。僞也。特恐余他逸。冀有所留戀。終身在此耳。不知余欲去。雖嚴守之。仍無益也。余不欲去。卽曩之席地而臥。冷飯粗茶。亦甘之。何用此美人計爲。余身居虎口。不知死活。猶欲造孽耶。復出閉門而臥。次日。李令陸再言。憤極。莫知所措。而李已令人收拾臥處。度不能免。謂龐女曰。頭子美意難却。第我瘡疾未愈。兩腕兩踝胸次。瘡毒正潰爛。須調養。宜緩至來春。否則反速余死也。女首肯。復諄諄屬託。女果言於李。事獲緩。此亦龐父女欲施籠絡計也。十二月。喬賊送來字畫。李屬余就中堂張挂。幅長甚。須接梯。辭以胸際瘡痛。復屬陸。陸亦病。馮又值他往。李怒大詈。余欲激陸怒。使與李鬪。因曰。我新傢伙也。無

能爲爾亦甘受其詈耶。陸果怒。一躍而出。欲與李併命。李以陸爲老賊。不與爭。復拉李同赴遡逆處。喊訴。經衆勸解。以故李陸怨甚。維時遡逆股衆。已得調赴徽州打仗之信。正月內起程。專以值逆守金邑。余之使李陸結怨者。實欲藉此去而之他。賊中所謂過館。而使盈之先回家。則李必不疑其回家。而疑其不欲赴徽。相偕而匿於值逆隊中。守城圖安逸。余却偕陸他往。一面密屬盈之。同日出城。則盈之之歸。或無後患耳。是晚。遂聳陸過館。陸欣然曰。先得我心。事在必行。且言溧陽某館。我舊交。當往歸之。密定歲除日動身。並偕小陳。及一皖人。一浙人。一句容人。同往。余至石賊館。招盈之。語以故。定屆期。一早出城。弟往家鄉一方。抄小路行。余等出城。赴溧陽。又慮盈之難獨行。適石館中有劉姓者。南陽村老農。至誠人也。余商之。願偕行。因揖劉曰。吾弟交與君矣。屆期必行。諸惟慎密。苟誤事。不保首領。劉諾。旣思遍地皆賊。無僞路票。必稽阻。復回館。填寫。鈐以

僞印。票中詭言至鎮江一帶採買食物。送交盈之。珍重而別。劉姓而外無知者。屆期。余偕陸賊等五人。出南門行。盈之處不及知照。其行與否。福耶禍耶。不得消息矣。陸不良於行。又咯血。余亦甚委頓。趨小路三日。始至溧陽。溧陽守賊亦屬侍逆。有潑天燕。酈姓者。湖北人。卽陸賊舊相識。遂入其館。酈從侍逆犯皖未歸。館中主事。乃其假子桂芳。及二三僞屬。又本城少婦二。酈及假子。各據其一者。桂芳。江右人。貌韶秀。通文墨。年十六。爲酈擄充公子。今八年矣。居館多暇。喜作韻語。纏綿悱惻。頗如其人。余惜之。又深恥之。城內爲侍逆巢穴。僞府在焉。賊館甚安靜。居處若無事然。街衢往來。與平人等。鄉人蓄髮來此。擺攤貿易。各物咸備。城外瓦礫場搭草屋。稱買賣街。土倡且爭趨之。蓋自失守。幾及一載。賊酷烈之氣。銷磨於子女玉帛中。故漸得與百姓無擾。余念盈之到家後。若竟被金壇賊尋至家中。人必以未歸抵飾。賊或疑余弟兄同過館。不之究。又恐國富暗

中陵使。患生不測。繼思國富。佃余家田。數世多待以恩。或不至此。展轉尋思。五內若鹿盧然。復自解憂慮無益。少緩。余當自爲歸計。今居此。較清靜。一無所事。欲將庚申閏月以來被難情形。筆之於紙。而方寸不定。舉筆輒停。不知從何說起。惟終日書空咄咄。或擁被以臥耳。三月。陸約赴西門外買賣街。有設肆賣藥者。面頗熟。近前却先呼余名。乃族人開恕。以陸隨行。不便語。數日後。余借故獨出。詢以家事。及盈之到家否。答以久出弗知。因密約偕歸。行有日矣。爲陸凱破。告桂芳諸人。暗中牽制。竟不果。絕好機會。交臂而失。殆難星未脫歟。五月。侍逆所蓄伶人。於城外演劇。陸約往觀。伶多皖人。壯年長髮。生旦多其變童。醜態畢露。余厭之。天氣蒸鬱。欲先歸。陸弗許。俄覺心煩目眩。不省人事。蓋痧也。有湖南人攜挑痧具。適在旁。爲施數十鍼。見血始甦。已仆地踰刻矣。陸言初刺二十餘鍼。無血。衆謂莫救。擬置僻處。令人埋之。此人力阻。復盡力刺兩腿曲處。始見紫

黑血再刺脣際。二鍼始出聲。不然已被人埋諸地下。嗚呼。使無此人。寧復得追思往事耶。徒以狼狽回館。未及詢其姓字。亦未言謝片語。至今猶若負疚然。惟略記其年約五十許。花白長鬚。長身鶴立。或言其人賣藥黃州。被賊擄數年矣。酈賊所擄婦。妖好愈桂芳婦。酈出桂芳私數月矣。時酷暑。桂芳醉臥。婦迎涼院中。陸因與通。有僞屬典茶江賊者。素忌陸。知其事。欲告桂芳。無證據。留心察視。致陸死命。小陳知之。言於陸。陸懼禍不自安。思戕江無隙。而桂芳已稍稍聞矣。七月初旬。陸復約往觀劇。有負鳥槍來者。爲金壇李賊館中鳳陽人。方老。小余等驚甚。謂必李館尋至矣。陸度不及脫。欲與鬪。方急止曰。我亦過館者。船在河下。盍往一談。因隨行。盤詰再四。信之。船中男婦八九人。方之母妻及其友自鳳陽來投賊者。問何往。曰蘇州。蓋方戚有僞城天侯者。和州人。梁姓。在蘇馳信招方。方復回鳳陽。攜家往歸也。余急詢方等離金壇。後石明幹館中。亦有人去否。

曰石館錢先生。及一劉姓老人。同日他往。詢兩館人動身後。賊追尋否。曰是日。至晚始覺。石館覓錢劉二人亦不見。於是兩館頭子言於遯逆。意謂必係不欲。赴徽。而匿值逆隊中。希冀守城。乃閉門大索一夜。次日至午。仍不得。復令馬賊。十七。四出尋覓。詢有被追回者否。曰無。又詢龐國富來過否。曰無。曾派人赴余家探問否。曰頭子謂兩館人必同過館。殊自怨艾。後遂置不問。余心始大慰。自幸盈之之歸無患。而計之得如願以償也。陸懷鬼胎。慮江賊不下已。桂芳亦嘖有煩言。乃與方謀同赴蘇。又慮余洩其事。逼余偕往。隨令小陳回館。取其細軟。當晚開船。越五日。抵蘇。而梁姓賊目。已爲僞帥僚天義鄧光明調去。先二日起。隊由嘉興往石門縣矣。方在蘇。停船二日。復開行。經太湖寶帶橋東首。聞吹角聲。倏忽小船紛集。數十艘。鎗彈雨下。同行賊艘共十餘。亦施鎗礮。隨敵隨行。方左腿受彈。自取刀剗出。裹以布。促舵工速行。喊聲雷動。余蟻曲艙中。瞑目靜聽。

自忖鎗船必係官兵。若來船當自陳被難實情。或可免。復慮倉卒間未必容自陳。仍弗免。玉石俱碎。危懼栗栗。幾不自持。俄聞舵工亦中彈墮湖死。方自握舵。禦良久。始突出。其實非官兵。乃湖中鎗匪。見賊船少。突來攫取財物耳。次日抵嘉興。又二日。至石門。方往見梁喜。甚惜其腿傷。弗克爲前敵。乃分其館之文弱。及受傷者約二十人。此次新來男婦十數人。別爲一館。使爲之目。陸賊副之。遂住石門。初。梁在和州時。與其黨數十人。結爲兄弟。同生死。由擒匪投賊。方最幼。咸呼爲老小。人尙誠直。母年六十許。矯健若男子。妻亦大脚。似皆可充前敵者。賊館湫隘。余瘡已愈。惟兩踝破爛。不易收口。至是更甚。近雖無甚拘束。顧愈行愈遠。欲歸不得。髮蟲纍纍。若囚犯。憤極。每搔首蹬足。繼之以泣。九月下旬起。忠逆率其悍黨。分塗攻撲杭州。調石門守賊鄧光明赴杭。梁隨行。留方住石門館。余終日無事。苦無可語者。仍以一睡字訣消歲月。忽小陳攜書一筐至。喜極。檢

視之。乃破殘字典十餘本。置牀頭。如獲至寶。又一日。館中新擄鄉人四五輩。相偕亡去。當夕。拘回三人。方令殺之。陸已取刀矣。余急語方曰。此三人逃去。固應殺。然我輩皆是過來人。請赦之。我保其不再逃。陸顧余笑。方問故。陸以余逸去。捉回事語之。方意始釋。令刺字。余固說。復免。方本誠厚。且最喜聽因果事。陸亦爲病所苦。無曩之殘忍。故得余一言。三人獲免。亦係命該不絕耳。十一月二十八日。杭城陷。王中丞有齡。張學政錫庚。瑞將軍昌傑。都統純文。總戎瑞麟。署布政使趾。甯按察使曾綸。暹糧道福。胡道元。博。彭道斯。舉。朱道琦。吳署仁和縣令。保豐諸公死之。布政使林福祥。總兵米興朝。一輩胥不死。後有以罪伏軍法者。有從賊而仍見殺於賊者。有受僞職。意氣揚揚。更肆虐於民者。吁。兩大間亦胡爲而竟有若輩哉。駐防闔營皆殉。嗟夫。不徒死之謂何。梁賊令方仍駐石門。嗣聞忠逆以攻陷杭州。鄧光明。尤悍勇。封僞歸王。與僞天將童容海守杭。不他調。

於是梁賊令方偕余等二三十人以往。十二月望前抵杭。歸逆踞布政使署。梁賊踞望仙橋下某參鋪爲館。方館余等於附近梁賊一雜貨鋪中。杭被困兩月餘。水洩不通。久乏糧。人多餓死。城陷幾兩旬。尙有伏屍側而攫食其肉者。悲慘之情。目擊淚下。余嘗力勸方請於梁。以米穀散給之。賊中咸詫爲異。雖事僅數日。使梁非僞顯官。又爲歸逆親信。必不能也。一日歸逆下令各隊目分排面排尾兩起。具冊送往點名。逆踞坐大堂。衣黃袍。戴黃綳。賊式便帽。年三十許。面白皙。兩腕珠寶釧各三四事。帽攢大珠十數粒。前列方桌四。置冊籍筆硯。僞屬官有曰軍政司者六人。左右坐。曰掌書大人者十餘人。列坐其次。先點排面。次排尾。有一賊與侍逆同姓名。歸逆怒其犯諱。立傳其館先生殺之。而降其館之目。一切舉動。若演劇然。閱二日。點畢。共六萬數千人。排面居十之七。排尾中男者居十之二三。女不及千人。蓋欲細核實數。定日需口糧若干。此僅歸逆一股。聞

童逆尙不止。此數賊中度歲亦行賀禮。衣鮮衣。往來街衢。頭目或衣五色短衣。首纏紅黃綢。乘馬。五七人一起。馬前各有舉僞銜旗者一人。擎紅黃傘者一人。馬後隨小賊一二人。進門必齊喊升官發財。見館目。則上前一跪。館目答跪。僞職較大。不答跪。略一蹲地。種種賊相。適足噴飯。頭目之婦。所謂貞人者。亦多窄袖艷裝。不挽髻。用采線結辮盤額上。抹粉塗脂。乘馬得得行。有小賊一二人。在轡首護持之。往來稱賀。全不爲怪。賊嗜賭。有所謂扛子寶者。選乾隆青錢二枚。旋轉之。覆以盃。猜字背。閩聚徹夜不息。一語不洽。輒怒目拍案。甚至舉刀相向。舍此無他賭法。云是楚中無賴所尙。取簡便也。平時或示禁。度歲則弛。故大小街巷幾無一處非賭扛子寶者。歸逆隊中。四鄉掠到米穀。都分別堆積。艮山門內大倉。幾十萬石。管糧爲僞戶政司。乃梁賊所兼。初僅派六七人看守。嗣因開倉。由仁錢兩僞監軍。賊中監軍猶縣令也派人憑歸逆票來倉領米。分散城鄉賊館。並領穀。

下鄉散種。梁派陸往司收發數目。陸以病辭。而慫慂余往。梁令方派賊十二人。與余同住倉中。派來賊皆皖人性多直率。其中有徐張二人。尤良馴。司持籌過。解暇時爲之講解因果事。及詢其各家當日遭難苦情。至有泣下者。余見其可動。益結以善詞。曉以大義。爲若輩深敬服。幾若一家。然此同治元年春二月事。計被難兩載矣。髮漸長。憂益劇。故鄉遙望。浮雲蔽空。骨肉誰在。狼虎正塞塗。匪特不得歸。亦不敢歸。思得本地人偕行。或可出網羅。因謂徐張諸人曰。倉中事一人不暇給。而聞附近各館有新擄之本地讀書人乎。幸爲我察聽之。徐曰。聞左首青龍街倪司馬館城破。獲一人。倪聞爲撫院文案胡姓。以其是官。不肯實言。致激倪怒。日加虐待。欲殺者屢屢矣。昨日尙見之。倘救援必宜速。因立偕徐往。倪出。徐爲略道來意。坐甫定。有二小賊押一老人出。年約五十。短衣。首包紅布。面黑黯。憔悴欲死。問爲誰。曰此妖頭也。賊誣官爲妖頭屢審其底細。不直說。行將殺

之詢此出何往。小賊曰：往小便耳。余前曰：君胡姓耶？此人直視無語。曰：請勿驚。我乃來救君者。君底細已略知。毋瞞我。胡應曰：幾瀕於死矣。何間爲？隨語倪曰：實告汝。渠胡姓。嘗爲浙撫幕客。試問汝何人。乃忍心害理。磨折斯人。渠旣被擄。諒難逃去。汝旣不能用。請交與我。偕回糧倉。倪知爲梁賊館中人。梁巨目也。度余亦爲梁類。意頗怯。乃曰：先生不必帶去。不敢再加虐待。衣之食之。聽其自便。或常與先生往還。亦不之禁。何如？曰：不可。汝言不足信。我必帶去。徐亦力言。倪始允。復慮倪疑余有私意。造言陷害。因詭言曰：汝之欲殺此人。以疑爲官。不實告。是因此間常態。原毋足怪。但余以風聞來救者。實以余與此人有世誼。今日知其被難。且瀕於死。特來援手。亦人之恆情。絕無他意也。回倉後。尙須赴梁館。告知其事。使知余非私來。用強索人。倪唯唯。又酬應數語。度無後患。始偕胡回倉。胡聞余言。知爲有心援手。回倉細詢其家世。及被難情形。乃浙之烏程縣明。

經名其昌。號梅垞。爲王中丞幕客。以軍功得五品官。城陷被難。復詢余。亦以被難苦情告。自是同起居。極相得。梅垞長古學。余以賊中憂鬱感慨所作韻語質之。亦見許。或爲刪改。講解體格。遂益契合。曩之詭言世誼者。今則儼然師弟矣。梅垞至滬。次年作古。其生平詩文稿蕩焉無存。惟記其贈余一首曰：性情風雅好吟詩。能負虛心自得師。下手工夫期典贍。留心字句莫支離。葛藤掃盡成佳構。花草拈來總妙詞。年少文章爭绚烂。須知前輩是成規。蓋余爲詩多率意。不喜磨鍊。故有是贈附。此以志教我者。既深且切。並可想見梅垞詩學焉。時賊衆紛紛趨浙東。攻諸暨之包村。

按有包神仙傳一篇。卽紀此事。照錄於此。以資考證。（諸暨縣城東北七十里。有村落。居者多包氏。故以包村稱焉。楓溪帶其前。白塔湖環於後。林深箐密。且以離城遠。其地遂爲鄉僻之區。包立生。農家子也。卽生於是村。性愚戇。多笑而寡言。身頎長。眉若劍上橫。目深而秀。初不知書。惟健力而善走。治田之暇。時投耒立隴畔。若有所思。人視之無他異。羣稱之爲馱。立生亦不愠。時年甫二十餘。若將老於農者。至咸豐十年庚申。鄉里忽譁然呼之爲神仙。郡中及旁縣亦多

知之。道路相傳。咸以爲口實。蓋始於是年六月。立生自謂有遇仙之異也。明年爲辛酉。九月。諸暨陷。當時郡縣陷於賊。必迫索城鄉之人。聚金帛以進。曰進貢。若疑其人將致之於死。則目之爲妖。故包村之人。聞縣城既陷。亦循其例作進貢。以冀免賊之來擾。然進貢必以人致詞。村中逃得二人。復強立生與俱往。賊一見立生。卽曰。此妖也。當殺之。立生坦然無懼色。賊亦卒不殺立生。旣而得間歸。同行者問立生入險何不懼。立生曰。若輩何足言。吾且搏取之。何懼焉。村人素驚其爲神仙。聞言益相驚異。且恐賊乘隙來侵掠。乃練民團。以立生主之。立生慷慨誓死。曰。吾屬而爲虜。寧以一戰出死而入生。村人信其言。怯者皆勇。故賊來犯。屢戰皆却之。每戰時。立生白衣冠先陣出。當者無不披靡。然其料敵頗慎密。其語人則雜神怪之說。嘗云遇仙時。曾得異香。焚此可知城中之虛實。且有神陰爲助。故賊至村外。或圍村。立生常怡然曰。天香未發。非戰時也。久之曰。

可矣。村人亦髣髴聞空中有異香。遂出戰。戰必大捷。賊中乃謠傳包神仙有異術。能飛竹兵。斷人頭。相戒不許言包字。以是賊殞於包村者。不可悉數。然合一村任戰者。不過三千餘人。實賴立生指揮之。其軍中旗分紅青黃白皂五色。色爲一隊。進退有節制。雖素知兵者。每見其臨陣不亂。從容整暇。多歎爲不可及。遠近聞其捍賊有方略。爭挈家以依之。包村之名乃益震。至壬戌之夏。賊集精銳。誓必破包村。至七月初一日。賊以隧道攻村。村遂破。死者十餘萬人。立生突圍出。至馬面山。受彈死。年僅二十五歲也。人有言立生以尸解。或謂兵敗遂逸去。皆不足信。蓋以立生曾言遇仙。故附會而成此說耳。立生被難後。吾里人倪杰。上其狀。以義士相許。村未破時。餘姚朱蘭。曾騰書於朝。言其可用。其陳述必有可采。惜今無從得之。毛對山墨餘錄。紀立生事。云其友人得聞於立生之表弟馮仰山。馮蓋曾奉吳曉帆兵備牒。親至包村。招立生者。其語固有可信。然好

作荒誕支離之語。亦如吾鄉人之詡爲包神仙也。惟所紀當賊欲由溫台進規福建。患包牽制。願以紹興府城與之。請其不助官軍。或言若得府城。足資守禦。勸包姑相許。包笑曰。此誘我也。無論江浙俱陷。孤城難守。且入城則如困囹圄。糧餉易絕。扼吭之勢。恐無一人可逃也。拒不納。是立生沈幾觀變。誠有過人者。並最錄之。以信其事。新被擄者頗衆。徐姓復於近倉賊館。索得二人。中表行也。竟日涕泣。幾不欲生。乞余釋歸。余曰。目下遍地是賊。卽釋子。亦未必能歸。容緩圖之。梅垞諸人亦勸慰。始無苦詢之。皆學中人也。仁錢兩邑來領米者。皆衙門書吏。擇尙平安者。試與議曰。此間有二人。能爲我帶出。送回紹興否。曰。能。曰。二人分兩次帶去。每去一人。多發米十石。以酬爾勞。惟必須將其人送到。余先寫合同。分半與彼。俟其到後。親筆就合同註某日到紹字樣。仍交爾帶回對驗。始可憑準。又慮人心叵測。復密授其人古詩一句。到紹後。亦寫在合同。此則他

人不知者。又曰。其米俟二人俱帶去。繳回合同照給。均允諾。立誓不欺。不一月。二人去。合同及詩句筆迹。驗都符。如數酬之。使徐張諸人非善類。余不敢從。非救人也。一日。與梅垞謀脫網羅。曰。我所以遲至今日。未作歸計者。以離家漸遠。不識道路。不敢遽行耳。肯甘心爲賊中人哉。曰。良知子意。得偕行極妙。能抵上海。則舊友吳平齋。趙吟蕉。兩觀察皆在。弗愁無立足地。然余亦不識道路。尙須覓一本處人。偕行乃可。忽憶某賊館。有杭人邵子雲。茂才者。亦以城陷。被擄在賊中。明日當偕往訪之。及往。無隙談。又明日。使徐姓招來。一見若舊相識。自是時相過從。飲酒歌詩。苦中作樂。子雲早出晚歸。或隔宿始歸。其館日知在倉。不禁阻。余仍二三日一至望仙橋方館。與方陸小聚。使覲無破綻。至徐張諸人。皆於余心悅誠服。不患有他變。五月底。再與梅垞子雲議。子雲曰。事不宜遲。城外方家街地方。余家佃戶所居。莊屋在焉。出城。先至莊屋暫避。相機而動。詢余有

川資否。曰：梁賊每七日給零用青蚨三百，都爲徐張輩沽酒飲矣。然則奈何？梅垞曰：何不多發米若干，託領米者變價，藉資成行。余亦謂然。逮領米者來，先與言定，多發百石，石需洋錢一圓。其人喜甚，曰：明日先攜洋錢百圓交明，再請發米。以其時城外米價，每石四五圓，渠有貪圖也。次日果如數交來，隨發米去。子雲檢視之，適用者僅三十七圓，餘皆僞作。余曰：上海路非遙，度可敷用。遂將此三十七圓，三人分纏腰際，議定。六月初六日起身，余所服衣袴本皆白布爲之，無賊中式樣，辮髮仍用黑線，今之成行，絕無顧忌。惟袖內蓄藍布夾被一條，子雲帶草席一張，梅垞攜葵扇一柄，余另蓄剪刀一柄，痧藥二瓶，針數枚。以余口音異，議出城時，余前行，備應答詰問者。旣出城，則子雲前行，余居中不言語。梅垞隨後備問途。初五日，晚飯後，語徐張曰：爾輩亦皆有室家人，與余同不幸，被難，卽有自投賊中者，亦因地方遭賊蹂躪，人亡家破，無安身所，不得不來。然皆

非甘心投賊可比。總宜勉做好人。卽賊中未嘗不可積陰騭。遇機會。脫出賊外。最是長策。徐曰。現在幾成賊世界。將從何處謀生。曰。上海卽生路。事在人爲耳。若輩不知。余翌日即行。言中有物。隨以他語支開。臨臥。復作書置牀褥下。留給梁陸方諸賊。大要勸其革面洗心。賊中雖足奢侈淫樂。斷難久恃。宜與官兵聯爲內應。獻城。或乘機率黨反戈殺賊。投軍營効力贖罪。舍此必無善死法云云。明知無益於事。亦信筆直書。突口以出也。初六日。一早。子雲來。飯畢。將徐張諸人支使他往。遂偕梅坨子雲。就近出艮山門。守門賊無稽阻。以隔水。莫能飛渡。復入城。至武林門。守賊盤詰。以梁賊使赴城外某倉。幫收米石對。不復問。遂緩步。故作言笑而出。行不百武。右首轉彎向北。直趨方家街。日午。至其處。屋固在。而闕然無人。村前過路賊。仍三五成羣。時或往來。余等相率暫避樓上。先散髮出剪。屬子雲爲余截去二寸許。留寸餘。長短若杭人。復下樓取僻靜路。擬趨海。

甯東行。時浙西各屬。久經陷賊。賊僞稱安民。隨處黏示。鄉民恃以無恐。市肆如常貿易。第各物騰貴。一粗糲需百錢。初九抵海甯。日已西。燧飯未畢。忽聞傳有賊數萬將過此。居人驚駭奔逸。余等急趨小徑。得荒冢深處避之。子雲謂偷前塗梗塞。與其冒險而行。莫若依舊折回。渡錢塘。由紹興至甯波。再圖他往。是夜露宿。次日仍不能行。不得已抄小路回杭。以不辨路徑。十六日午前。始至望江門外。渡江。江沙幾及膝。備極艱苦。及渡至赭山塢地方。方欲就茶肆用茶點。又紛傳蕭山有賊隊將到。以近江民人。殺害數賊。來屠戮報仇。多有忽促。渡江避難者。余三人復夾入衆中。不由分說。推擠渡江。賴渡舟平闊。無沈沒患。既復渡回。筋力皆疲。擇江邊地偃身臥。驚喘莫能作一語。日薄西崦。悵悵不知何往。竟日未進食。飢腸若轉圜。余謂在此非計。宜乘月色連夜行。見可棲止處。卽往投之。並可探路徑。行約二三里。遠見屋中有火。至則乃小廟。一乞兒就牆側支缺。

口。餓。糞。物。見。余。等。至。若。甚。驚。遽。子。雲。急。慰。曰。我。輩。乃。過。路。人。勿。恐。詢。糞。何。物。曰。田。雞。能。分。我。一。盃。否。曰。甌。中。止。敷。我。食。尙。有。鮮。者。約。二。斤。在。此。詢。其。值。曰。我。亦。不。知。其。值。隨。意。給。與。何。如。於。是。給。以。百。錢。子。雲。持。至。水。際。出。腰。閒。剪。割。洗。余。就。廟。側。竹。籬。抽。作。柴。薪。而。以。布。被。草。席。屬。梅。垞。守。之。待。乞。兒。啖。畢。取。甌。掬。水。煮。之。初。不。知。此。物。尙。須。剝。皮。也。煮。良。久。不。爛。飢。不。可。耐。各。就。甌。內。攪。四。五。隻。帶。皮。食。之。腹。少。果。蚊。殷。殷。然。若。雷。鳴。揮。之。不。去。倦。極。不。成。寐。欲。詢。乞。兒。去。路。則。已。齟。然。睡。去。矣。子。雲。頗。曠。達。而。梅。垞。憂。甚。余。二。人。尙。須。時。作。笑。語。冀。稍。排。解。子。雲。詢。余。曰。眼。前。眠。食。孰。若。此。君。樂。曰。反。視。曩。在。賊。中。今。夜。亦。何。樂。不。若。此。君。倘。死。是。閒。已。愈。死。於。賊。中。不。知。高。幾。百。由。旬。聖。人。曰。朝。聞。道。夕。死。可。矣。余。則。曰。朝。出。賊。中。夕。死。可。矣。何。不。樂。之。有。且。不。必。死。耶。第。他。日。出。網。羅。今。夕。之。攫。食。帶。皮。坐。魚。正。不。可。忘。也。十。七。日。黎。明。起。身。乞。兒。已。去。破。甌。僅。存。遂。相。偕。北。行。已。刻。經。塘。西。鎮。

得飽餐。復西北行。不數里。日過午。熱甚。子雲以痧脹臥地。梅垞情急欲死。余曰。急徒然。因取針刺其脣際。得血少許。復納痧藥於口。不得下。急趨池畔。覓得蚌殼。取水灌之。喉間格格有聲。梅垞持扇搧之。始甦。嗣後深得其法。皆獲效。遂復行。烈日暴雨。夜多露宿。飢不得食。痧脹則人人不免。無日無之。又不識道路。迴旋跋涉。越八日。抵烏鎮地方。烏近兩省三府交界處。極大市肆。絲業所萃。雖爲賊踞。而貿易若承平然。梅垞遇其弟某於某絲行。邀往小住。飲食周備。驚魂於是乎乃定。正籌赴滬。而梅垞病矣。其弟欲余與子雲先行。梅垞以同患難。不忍中塗分手。止之。七月初一日。始由其弟代雇脚划船啓行。以沿途多賊蹤。率於夜間沿河支流汊港中。遇前途有阻。則折回覓他塗。船身窄。底削。舟子時屬勿動。動則傾覆。雖小便。亦須傍岸。又異常燥熱。不敢熟睡。卽恍惚睡去。必撼之使醒。或三人都睡去。舟子亦必喚醒之。慮翻身覆舟也。身若蠶之在繭。而心却秦。

然。初九日。至南匯。始出賊境。薙髮。每人爲薙匠。索去洋錢一圓。昔日頭顱。依然還我。快哉。快哉。相偕復登舟行。十一日日出。抵上海。慶更生焉。梅垞旋訪吟蕉。觀察益湯。銜子雲訪其婦翁新北門。而暫處余於集賢里某客棧。攜出之資。僅贖一圓。以之購蚊帳。餘青蚨二百六十。購布枕一。枕席一。葵扇一。住三日。梅垞薦至其鄉人吳樸堂。廣文處司筆札。廣文平齋觀察從子也。嗚呼。計自被難至今。閱月凡三十有二。不可謂不久矣。身所親歷。目所親覩。萬苦千辛。窮兇極惡。不可謂不至矣。極矣。何期還戴吾頭。得不痛定思痛。爰撫拾事實。漫爲長篇。目之曰思痛記。亦曰太平軍中被難記。留以遺我後人。俾有鑒於茲。決機宜早。勿玩誤。因循。至噬臍之莫及云。

跋

此余友李君追念被難時賊中往事而作也。李君語余曰：斯痛也，非吾一人之痛。而凡爲賊所擄者，千萬人之痛也。非賊能盡人而與之痛，而實人人自召之痛也。向使吾家知早避賊，無不可以免斯痛。吾之述此篇，將以貽夫他日之因循却顧，當斷不斷，而自蹈於賊中之痛。其幸而如吾之萬死一生，其不幸且一死而不可復生者，而紀事云乎哉？而屬文云乎哉？余聞而避之曰：唯唯。請爲君表作書之意可乎？光緒六年季秋同里金遺謹跋。



太平軍中被難記 跋

寄售減價書籍廣告

山東師範講義

訂正三版

四冊

原價二元
今減售實洋壹元

警察講義錄

十四冊

原價五元
今減售實洋二元五角

洋裝布面金字一冊

最近物理學教科書

陳應泰
古文光
陳思植

原價一元七角
今減售實洋九角

礦物界教科書

一冊

原價七角
今減售實洋三角五分

上列四種存書無多如欲購者請至振寰書局購取

上海三馬路西書錦里四百十四號

民國三年十月出版 定價洋二角五分

著者 江 霽 李 圭

發行者 振 寰 書 局

印刷者 四馬路東首廿一號 中國圖書公司印刷所

寄售者 中 華 圖 書 館
藝 林 書 局

外 埠 各省各大書局

總發行所 三馬路盤錦里 上海振寰書局

版權
所有

